

**Muhyiddin Ucap Selamat Jalan Kepada Sukarelawan YSS Ke Vietnam  
Bernama  
July 15, 2014**

KUALA LUMPUR, 15 Julai (Bernama) -- Timbalan Perdana Menteri Tan Sri Muhyiddin Yassin hari ini mengucapkan selamat berjuang kepada 30 sukarelawan Yayasan Sukarelawan Siswa (YSS) yang akan menyertai misi 'Green Summer Volunteer Campaign 2014 Vietnam'.

Muhyiddin, yang juga penaung yayasan itu berharap kerja amal yang akan dicurahkan para sukarelawan terbabit akan diberkati Allah dan diberikan ganjaran pahala sebanyak-banyaknya.

"Saya yakin YSS menerusi program yang dilaksanakan akan dapat membantu rakyat marhaen di sana hidup dalam keadaan yang lebih bermakna.

"Selamat berangkat dan kembali ke tanah air dalam keadaan sejahtera," katanya dalam khidmat pesanan ringkas (SMS) yang diterima Bernama di sini.

Timbalan Perdana Menteri turut mengambil kesempatan merakamkan ucapan Selamat Hari Raya Aidilfitri kepada semua sukarelawan dan petugas itu.

Sebelum ini, Pengerusi YSS Datuk Zuraidah Atan dilaporkan berkata Malaysia adalah negara tunggal di luar Vietnam yang diundang untuk turut terlibat dalam misi tahunan berkenaan yang dijadual berlangsung sehingga 10 Ogos depan.

Misi tersebut merupakan satu daripada lima kempen utama digerakkan Ho Chi Minh City Youth Union dan Persatuan Pelajar Vietnam untuk memupuk semangat kesukarelawan dalam kalangan rakyat negara itu.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1053739>